

白
華
後
稿

白華後稿卷之二十三

南匯吳省欽沖之墓

男

敬樞星宰
敬沐起元 校字

墓志銘

誥授朝議大夫內閣侍讀學士費公墓志銘

予同年內閣侍讀學士費公長身玉立飲啖輒倍人生
平不省醫藥忽腹脇痛甚苦晝夜按以行則少止鑿者
都不省予問疾猶數見見輒屬以幽隧之文予惻之而
姑以慰也旣哭寢門其孤卜地某邨其葬期未卜而預
請爲之志志曰公諱南英字希文號道峯又號敬菴以
雍正二年三月十五日生乾隆四十九年十二月二十

三日卒五十年月日塋乾隆十二年二十八年中式
舉人進士科之歲也工部營繕司主事員外郎都水司
郎中江南道監察御史鴻臚寺少卿光祿寺少卿內閣
侍讀學士其所歷之官寶源局監督巡視中城甲午山
東副考官癸卯雲南正考官甲辰會試同考官其所奉
之使也曾祖和鈞歲貢生候選訓導祖鳳池庠生舉賢
良方正以疾不赴父傳馨太學生祖父俱贈朝議大夫
江南道監察御史祖母於繼沈母嚴俱贈恭人配徐恭
人子四紹元附監生贊元先卒邦直寶元俱太學生女
二長適候選布政司理問於鉉次未字孫一孫女二故

事曹司日一人宿署應直謂之當月公初仕累日月磨其任工作所在勾稽校覈奸吏無所容柴廠煤炭廠火藥局硝磺庫諸劇務堂上官惟公是倚督錢法時凡解到銅鉛隨驗隨收無少苛滯在臺中先後條上六事其議行者禁琉璃廠肆摺紳錄錄已故與未仕之人以重官制請捐復人員戶部先咨查工部視任內有無核減銀兩方准報捐以嚴官欠請州縣驛站酌令佐貳官兼理以重郵政方四歲就塾詠無花果二十言爲司訓所賞司訓貧特甚公爲論以諷曰韓宣憂貧叔向賀之顏子安貧孔子賢之時甫九歲耳館石冢某氏讀文選聲

徹夜主人以爲狂相詰問乞所藏書盡讀之歷舟車手
未嘗釋卷于經尤邃于易其論詩宗李杜晚年耽小詞
日臨晉宋人帖數紙以爲清課弱冠喪太學公困絕不
能自存遠館數百里外其後赴公車教習景山官學奔
司訓及沈恭人嚴恭人之喪哀慟幾絕銜卹終身雖淳
轅順遂不以侈車馬服食之奉廉隅硜謹非義者千金
不以盼也當乙未冬公展墓歸里有視學山右之命翌
日以在假改簡又嘗有所陳請

上以原摺封還廷臣不得聞其故公亦不敢以語人一
歲三遷漸幾嚮用且斐筵 寵宴相距不過旬餘促

不及待命實爲之而裘馬少年坐失一老成敦樸者爲
之準的是又深可致惜爾矣公有經解四卷論著四卷
樂府二卷道峯詩鈔六卷日下集五卷新試帖二卷子
所論定者楚中詩四卷皇華集二卷詞一卷銘曰
費之先漢梁相家烏程姓乃望厥後遷豫章郡復其鄉
唐代近宋直院謚文端葬射邨居歸安廿三世公挺生
能其官文蚤名嗇於初旰於末捐館年六十一其遺訓
敦學品勒此詞萬耳信

誥授中憲大夫光祿寺少卿沈公墓志銘

乾隆五十一年春二月

上巡幸五臺

命先期引

見京察官於是光祿

寺少卿秀水沈公以病

子休公精吟咀之術活人

殆不勝計體故羸服食足以自攝年未遽六十太夫人
雅就養旣罷去將賣宅買舟謀菽水之奉日走別故人
訪五城舊蹟戒以三月之十九日遊畏吾邨而是蚤塔
焉化矣子與公同舉同卿寺二年知公之豈弟樂易而
不究其報知公之詳明堅定而不竟其施憶前年去年
展重陽後一日迎 駕密雲偕宿昌平之橋亭子時
秋稼蔽獲原野清灑步邨南小池上公語子頗以家江
風景思奉母歸結數椽板輿花下乞子文先人之瑩乃

其志未以遂而一二故人星流雨散旣歎逝者行復自
念此不得不徇其孤之請而辭不文也公諱琳字潤輝
號華坪少就傳輒了大義年十七籍學官二十八魁鄉
試房三十三成進士歷兵部職方司主事武庫武選員
外郎郎中江南道監察御史吏科給事中巡南城巡南
漕監鄉會內簾試事各一監外簾試事者四游貳京卿
責任轉簡其軍政之高下銓法之遲速庶獄之輕重行
漕之利害不操切不滲漏至外簾數弊予間聞其一二
及今秋得 旨監臨而寢門之慟已及半載末由以
受開益今其孤潛山縣丞方大來自皖江雖少以慰含

飴之隱而公之將以養請將以病請病未亟而遽亟養可終而不終論者輒含悃焉公居家有內行與王恭人事葉太恭人數十年如一日遭贈公喪時年四十一矣粥飲者累數月不杖竟不能起事季父有子道與人交甚親而有裁制其歿也多反袂者距生雍正七年年五十有八越某年某月葬某縣某原銘曰

公所家濮樂院自前朝隱未見曾祖父以字行曰載羸曰雲卿曰維章邀贈榮歲乙亥穀不熟貸不償千鍾粟越來歲公舉鄉產雖斥名益彰歷臺省卿寺陟母望九承朝夕女子四嫁者三有一孫乳尚名公論文宗韓歐

今銘公筆不逾丹旄旋葬有日長水湄卜云吉

詰授光祿大夫刑部浙江司郎中前刑部左侍

郎杜公墓誌銘

上欽恤民命用慎庶獄刑部郎舉其職者不次長貳是
部匹夫婦之控籲 命使勘讞不得其情不止金匱杜
公爲郎時隨故尚書兆公惠侍郎錢公汝誠之宣化隨
尚書今大學士阿公桂尚書裴公曰修之霸州隨侍郎
四公達之福州侍郎阿公永阿之保定旣爲侍郎使成
都使長沙兩使江夏扈行江南留蘇州讞雩都教諭枉
劾事留淮安讞清河宿遷冒賑事又其間自壬辰春入

蜀己亥冬辭蜀跋山涉澗矢石如蝟軍精之輸輓軍需
之支算手披口決無少苛濫以是爲練才而遇

主焉矣乙巳夏戶曹郎海昇斃其妻公願身短視勘驗
不得實譴伊犁明年九月得旨赦還次蘭州聞授曹
郎之命時已抱末疾悲感不自勝馳至涇陽而歿人
以歎公之才固以結

主知雖一節疎漏

天子不以是棄公稍假之年必復其始而大命不延凶
問奄至此予所以感慨論議而竊念士之不可不自立
也公十二歲而侍養入都居四年補大興縣博士弟子

員得第後改復原籍觀政刑部遇案例誦記不忘於法
於理於情必求其當故未補官而總辦秋審既截取知
府而長貳請以陞銜留郎中任郎中有陞銜留任者自
公始公爲文下筆立就雅州當金川南路之衝移駐三
年不廢嘯歌予嘗和其登城樓詩倡修成都草堂子時
受代將還促予預爲之記其虛懷善下當諷漢川武舉
胡懷三賄僮僮認兇手事適有未安兩府不能言予一
言而釋且以謂直諒又嘗語予善同里楊鳴遠楊旅病
且革以貧薄孤幼爲屬因以長女許字其孤予以語公
之孤而孤未之知則其他嫚言謹舉爲人所不知者又

可勝道哉公氏杜諱玉林字寶樹又字曲江又字凝臺
乾隆庚午舉人甲戌進士歷刑部主事員外郎郎中除
江西南康府知府未抵任擢江西吉安贛道會丁內憂
服闋補四川鹽驛道卽其地晉按察司按察使布政司
布政使擢刑部侍郎鑄級以三品京堂用旋擢工部右
侍郎兼署刑部侍郎事終刑部左侍郎充殿試讀卷官
順天鄉試副考官各一閱朝考新進士卷閱三館臚錄
卷各二曾祖圻祖錦俱太學生父灝乾隆甲子舉人直
隸沙河縣知縣以公貴俱贈光祿大夫刑部左侍郎曾
祖妣蔡祖妣孫妣孫眞贈一品夫人娶宋夫人乾隆乙

丑進士山東利津縣知縣煥女繼毛夫人國學生嘉模
女亦先卒子光炎國學生安徽試吏目楊芳潤湖南試
吏目陳鑠其女子婿也國學生謝應鏘其撫弟之女子
壻也幼女未字孫一孫女三宋夫人毛夫人始祔於邑
之嶧峒灣光炎將卜地塋公而遷祔焉葬以某年月日
生以雍正六年八月日卒以乾隆五十三年三月日銘
曰

公之先世自汴而南公也第二與兄弟三就傅之初一
日千里占籍京華於古有此讀書讀律會遭外憂 命
假六月以表松楸陳情終制乃公大節自是在官歲無

停轍二金逆命三路出師有中有南峙嶺是資庸咏依
然廩祿有幾髮釜金延百數千指緬公之行把公之詩
詩有八卷餘文倍之西徼投荒 賜環承寵六表遠終
銘茲泉壟

賜進士及第湖南辰州府知府諸公墓志銘

吾師餘姚諸公之病也省欽自廣西奉使還京道武昌
執手語移時別踰月訃至言櫬已歸去孤開塚纔十四
歲耳去夏開塚來應雍試哀公遺文若詩止四卷散佚
過半如癸未甲申間同省欽作者至一卷而省欽所同
作亦散佚幾半竊念名位有定時命固阻雖華實茂美

體用兼備之士有幸有不幸或天之旣已阨之而將以
昌其文與其後固不可得而知也公少慧母蘇安人爲
杭州府學教授滋恢女公讀書學署如厲徵士鶚杭編
修世駿孫通政灝陳太僕兆崙宋侍講佩蓮皆著錄教
授門深共推挹論交在師友間而封公以經世之學主
大府章奏凡名律之輕重食貨之耗息與夫河渠軍政
之是非失得燭照數計每爲公指其端緒故公以第一
人冠中書直軍機者數年以第二人對策主山東鄉試
分校會試各一一時稱得士當公官中書時以察典名
記

御屏泊人翰林兩院長皆薦公習吏事

簡知辰州

府事中丞晉寧李公倚若左右手李剛直每負氣藩使者遇怒及公李去代之者爲藩使所親道出辰辰水方怒漲留二日始發以公玩民瘼劾罷修堤工蓋丙戌六月日也戊子夏予使黔過辰辰吏人指公緒茅棚編舟筏施粥米處又言辰水夾兩山作建瓴勢雖盛漲下一二日輒消舉客嗟太息於藩使爲戒云公旣歸與其孟侍堂上養蘇安人厭世會南豐李恭毅公開藩于蘇招封公公亦應梁文定公遊楚之招將歸痢劇而歿召公卿及士大夫交相撫輓以謂時命之不可知至此公諱

重光字申之一字桐嶼乾隆癸酉以副榜貢生舉於鄉
庚辰成進士歷內閣中書翰林院編修湖南辰州府知
府康熙五十九年七月二十四日生乾隆三十四年十
月十三日卒先世故姓朱元末彥明公由亳州遷餘姚
改今姓曾祖國正副榜貢生勅贈文林郎翰林院檢討
祖起新康熙丙戌進士翰林院檢討父諱先庚廩貢生
勅封承德郎翰林院編修後公四年卒配俞勅贈安人
繼孫勅封安人生開璩今爲廩貢生以省欽出公門下
不爲泚忍誣善之辭乞預爲之文俟卜地葬公與俞安
人而爲孫安人生壙焉銘曰

公在郡時太公就養七秩之辰優歌閼響曰維恭儉慈
惠可知弟有孤姪身爲之師六草三真問誰抗手制誥
之文猶在人口集止此夫官止此夫載銘幽隧載歆載
獻

誥封中憲大夫前河南陳州府知府張君墓志
銘

乾隆五十五年正月十一日 封中憲大夫京畿道監
察御史前河南陳州府知府張君卒於里距生雍正二
年四月十五日年六十七其孤百齡等擇地於大興縣
之某原俟來春井椁而乞省欽志之志曰君氏張諱法

良字素菴先世以瀋陽籍隸正黃旗漢軍曾祖奉祿贈
昭武大夫祖宏任熱河山莊供奉加遊擊銜贈懷遠將
軍父諱應魁直隸正定營都司曾祖妣李贈恭人祖妣
杜徐俱贈淑人母沈封恭人配李恭人子百齡京畿道
監察御史前翰林院編修仁齡廩膳生先卒錫齡候選
州同桂齡副榜貢生女一先卒適舉人邢昌孫一孫女
四君箴仕令嵐縣嵐於太原最貧瘠歲己卯饑申狀大
府得 予賑君釐按丁戶朝籍而夕給之又明年秋雹
君以請賑之需時也亟糶鄰縣粟而勸境內之蓋藏者
爲粥以食旣而得賑 旨下嵐之民無流移者治嵐十

年兼治岢嵐州者再繕成垣置義學榜所居室曰居易
言人居其難我居其易也某氏女通於中表王其父覺
而令之絕王復至執而誣以強鄰縣令奉檄會鞠入王
罪君以去就爭於府王得不死其同知寧波府也奉委
采銅於滇山水險遠銅船沈壞起撈率三四年始返輒
累金累千君發株掘根首尾二年而役歲涉洞庭颶風
作舟人惶怖號泣君肅衣冠致禱桅折而舟不覆人以
爲神省官錢數千緡大府交章薦旋以例引避調閩之
漳州府同知不數月擢守陳州時豫河決口未合督治
夫料日夜不少休又順年運餉於滇運糧於潞勞疾間

發歸而偃息數椽種花果石席國史自娛蓋君始以武職起家砥礪於學舉甲子順天鄉試百齡負詩名少時親爲之授爲守令三十年室無媵侍居無玩好衣不敝不改作有三弟皆爲之婚能援人之急遇人必以禮雖御下無褻嫚語在晉時同僚某於廣座侮之旁觀愕然君絕不與校其入滇也上官不滿君故以遠役苦之君欣然竟往其器量多類此生平不言內養屬續之蚤飲噉如平時已而腹痛歐淡不止端坐逝鼻觀垂玉筍扶寸嗚呼此亦足以覘君之守矣假而係懷榮利力疾戀官則棲遲數載間何遽不躋膺仕者而豈易睹哉銘曰

學而仕以從政也而家亦政也仕而已以引病也而歿無病也以惠我嘉師以型我碩耆不我是信徵我辭

勅封太孺人彭母歐陽太孺人墓誌銘

太孺人氏歐陽贈文林郎彭湖之妻進士錫璜拔貢生錫瑾進士錫珖之母也文林君有聲庠序好施與以父歿三母弟俱幼不赴舉孺人事姑歐陽得其歡悉委以家事強記古善言行以告錫璜兄弟遇有字之棄紙必澣以香水焚而瘞諸野遇古書畫圖籍必以績紡所出飲其購之貲塾之中漿醕茗餌之屬必豐且潔四十年間錫璜同祖兄弟十一人領鄉薦者一籍諸生者六僉

以謂微孺人不能相文林君以有成而錫璜兄弟大小
試凡得失利鈍孺人徵之讖與夢而無不信也憶予總
角時先大夫偕世父季父隨先祖歷諸試榜未發祖妣
倪太夫人預語家人曰夢一媼持金花草驟然至矣或
曰雙岐矣曰菱矣金花草者其節間吐黃花未花時鬚
美吾鄉人謂之草頭功令凡大小試合格者簪花披紅
予至今以謂神謂夫下帷至苦科名之事至難鄉曲小
夫若有三公不以易一第者職母教者專固凝一之氣
固有以召之而士之由甲乙科致身通籍者尤當念及
母劬勞之德以貽令名於無窮也錫璜之令三臺也孺

人以道遠未就養今以闕服除瓊之文昌詣子請曰卹民力慎民命吾母訓也吾母存亦不能渡海而錫璫需次爲選人錫瑾之子嘉恕亦以拔貢生入京筮某年月日啓吾父戚家坂之藏而錫瑾祇事焉幸銘之以存吾母銘曰

丁亥秋母也卒距生年開九秩男子三女子一女子夫周厚輟以辛卯登詞垣璜亦雋喜填門科名草連叢茁眷春暉逝何及天只天只以妥同穴以茲後昆只

壻上海喬淦玉繩覆校

白華後稿卷之二十四

南滙吳省欽冲之簣

男敬樞星宰
敬沐起元校字

墓志銘二

贈中憲大夫因亭陸公墓志銘

陸於吾郡族最望明嘉靖間上海文裕公深華亭文定公樹聲皆以翰林躋通顯品地清峻福齊於文所論譔傳於後文裕裔孫副都御史錫熊以纂四庫書由郎中改翰林院侍讀歷今官而翰林院侍讀學士伯焜先後十年間誦芬競爽才望相若實文定公七世孫南京刑部侍郎彥章之六世孫而贈中憲大夫因亭公長子也

公一字文思諱楣曾祖慶臻明崇禎壬午舉人名在幾
社祖諱光弼太學生父諱瑜康熙庚子舉人泰興縣教
諭以學士故贈中憲大夫妣顧贈恭人公之先自郡城
遷青浦之朱家角讓上田與三兄而已取其汙瘠者既
棄養獨任喪葬結茅墓側課耕作田下不可稍閒種蓮
芋菱芡之屬以自給中歲失明家益困蕭恭人率諸女
以十指謀朝糴及晡復如之公顧不以懟怨猶急人之
難有告者至解衣以應蕭恭人冬不棉夏不幬雜糠粃
以飽而公與學士兄弟在塾中未嘗無禦寒之衣適口
之食憶辛巳冬予割居婦弟宅學士偕子弟省蘭赴江

陰候學使者試迎 鑾賦脫布袍請予婦綴羊皮袖若
不得一當無以慰二親後十二年而應天津 行在試
賜舉人又七年入翰林又五年 御試翰詹諸臣置
一等擢今職去年以京察上考傳 諭問願就外任
否而學士嘗以舉人叙用知縣公再三寓戒毋強所不
能因以不習吏事謝公又戒以文定後不可無公祠無
公產以飲喪葬之用學士固以成之予京邸與學士隔
一牆各舉少賤時事與夫恩勤鞠育之狀其艱苦率相
視至貧而在下無可濟於物而此心皇皇然日不足此
則天之所報而非後之人自致其報特學士之所爲予

兄弟志焉未逮者爲抱痛而不自勝也公有因亭吟稿
叩槃集若干卷以康熙四十八年十一月初七日生乾
隆四十二年九月十一日卒蕭恭人以康熙五十年十
月十八日生乾隆二十八年六月十七日先公十四年
卒子二長卽學士君次仲勲太學生女三吳江太學生
沈廷一青浦太學生張景直常熟候選縣丞馬植基其
壻也孫四元琦元均元壻元培曾孫一壽銘某年月日
祔公與蕭恭人於縣之景字圩九峯橋祖塋之次學士
宜自爲之文而猥以屬予乃銘曰

廉惠之德家漸斥也詩禮之具昆自裕也生廬墓旁歿

而耐藏後道前岡漆燈用光

朝議大夫廣西梧州府知府前長蘆都轉鹽運使運同孟君墓志銘

太谷望孟氏官曹郎守郡監司者相望然自蘭舟通參
蘭溪大尹外由進士進者或尠吾門伯川太守於書學
輩文敏於詩學才調集又工爲制舉之文三晉之登館
閣者未能或之先也然齋志不一第授長蘆鹽運司運
同非其好也然卒能其官六年遷廣西梧州府知府將
引對矣會冬至集萬壽宮行禮海風大作冷徹肌膚亟
燭火暖足足遽弱乞歸調治又七年壬子九月十五夕

偕座客談笑氣稍逆就寢如常俄而嗒化去距生乾隆
壬戌六月初六日年五十有一其孤太學生熊飛候選
布政司經歷熊夢將以明年二月日葬之縣東楊家莊
先隴先期乞余誌之按狀君諱淦字伯川曰晴澗虛舟
其別字也先世故固原州元至正間仲明公隨父本周
公宦遊太原卜居大谷是爲始遷祖十二傳至贈朝議
大夫貴州平越府知府周衍是爲君祖君父平越府知
府 嫡母胡生母胡皆封恭人配溫恭人先十年卒
生兩孤及女子子適楊泳者也平越公爲長蘆運同於
鹽關口立浮橋君至出已力修之以鹽關秤架欹輕重

申請換准護運使者七閱月於陋規無所取每以仲兄
水部君商河東者數年產盡落故恤長蘆鹺者倍至當
庚子甲辰春

上巡幸江浙君先秋挽

御舟達江淮

予叙加二

級一遷出守謂有補於邊郡而甞蹙不興設施不竟故
可見者止此君有龕山詩四卷與帶津詩二卷清淮詩
四卷先行世未刻者龕山文一卷退思詩六卷環香集
四卷環香詞二卷子嘗念天之賦才亦殊國家之求才
亦甚切乃遇合之故在可知不可知之間科舉一途直
士人出身之始而舍是而致其身行其道者亦間有其

人焉此余所以重慨於君而文章九命之說舉足以槩之也去年春予視學畿輔歐血不可止因憶戊戌夏臥病三十日君兩劑而愈學醫不可費人學書不可不費紙每爲君諧笑之逝者可歎行自念耳而忍銘君墓哉銘曰

既庶加富堯舜憾斯晉多富民悴于鹽池君有同懷其力不支君有營額破甌用炊君官鹽官廉靜內持曰以行恕而敢自私官事若此內行可知孔訓文行疇其庶幾前岡後道瘞此隧辭

誥封奉直大夫累晉朝議大夫湖南辰州府知

府碭菴陳公墓志銘

公氏陳諱遇清字確士一字碭菴以奉賢縣學弟子員貢太學以子乾隆癸卯舉人候選大理寺寺丞延溥封奉直大夫乾隆辛丑進士湖南辰州府知府廷慶累晉朝議大夫曾祖諱蓋有傳耕堂集黃宮允之雋序以行祖諱祖壽父諱基贈奉直大夫祖母氏 母氏程贈恭人娶于顧封宜人累封恭人公少而強識能文章試南闈不利以父命割二季產而自取其下者別構宅於故宅東南數十武奉侍父母父病噎不解衣者踰年走百數十里求葬地丙舍建矣凡三易而始視窆從弟打箭

爐同知文錦卒於官爲經紀其喪與家事延塾師課子則命從子與之偕皆籍諸生有爲校官者自其子童子試至鄉會科必挈而蓋教之留京邸數年辰州郡署五年歸殯日歲適大祲衆以公乙亥丙子間出粟倡募飢餓者今廷溥繼其志而公之志慰公之澤爲勿衰公所居曰南橋其黠者請縣府移建漕倉所司議上矣公語予縣不產米糴於郡以輸郡西之倉今糴而載之歸不便一黃浦風濤惡百數十糧艘泊累月不便二移倉必度地納糧必動衆經費不能盡出於官而游惰適以逞其智不便三且四尹文端公督兩江時駁案具在予以

語前制府書公檢案遽寢蓋公熟於鄉之利弊創議葺縣志建文廟建儒學署倡捐縉皆不貲性溫直能急人之難乃義所不可爲則愍然深憂其旣然其才不大見於世然奉賢自析華亭置縣後垂七十年入翰林者惟廷慶兄弟俱列科名者亦惟廷溥廷慶令名是享福祿日來誠不意未大耋而嗟也然公之喪以乙卯正月歸是月銅仁苗與辰州苗相煽攻殺官吏軍械軍糧於辰取辦嚮使公尙就養必有教其子以襄戰績者難作而公且葬焉豈偶然也哉公以雍正元年十月二十一日生乾隆五十九年七月十六日卒乾隆六十年十月

二十五日葬于縣之某園某地並營顧恭人生壙焉廷
溥等寓書乞銘銘曰

奚貌之卷然奚量之淵然奚種德累行而弗底于大年
有女二有孫三豈惟厥子之賢佳哉漆室銘是鐫

中憲大夫掌湖廣道兼掌京畿道監察御史程

公墓志銘

當乾隆辛巳間予憂居里門東南士人僉

聖駕三至近光奏賦僉矯首礪角幸一當亡友葉抱崧
爲予兄弟言公高才樸學甫逾冠爲諸生祭酒予以是
耳公名癸卯冬予自楚還朝公時官中書子弟長女妻

公第四子世芸始面公過從洊密間示所論撰於漢學
旁疏曲證不武斷不鑿空斬斬明明無以測公經學與
選學之所至而公分校四庫書分校 盛京志總校一
統志覆校 武英殿書纂修方畧目芸手薈閣師舉以
是知公置內閣簽擬十一年無或舛漏卯出申歸日以
常充鄉試同考官者再巡視五牘漕務者再
召對皆稱

旨再書上考 記名以道府簡用乃一以願留京職辭
一以母老辭軟塵矮炕間雜蒔花竹琴壺鉛槧見者幾
忘爲長安邸舍矣今丙辰春予將按畿南試輒語予秋

涼當乞養南下檢勘故業以副畢生之志曾未改火傳
遠赴焉世芸愿而能文前十年予哭之世芸嗣子元濂
十歲矣前年殤予又哭之公少予十年素無疾神采奕
然今又哭之殆所謂名可掩位而年不酬德者耶予是
以悼公之學與化尙未竟而抱崧之齋志尤無窮也公
著書滿家行世者周禮故書攷儀禮古文攷禮記古訓
攷說文古語攷續方言補稻香樓試帖其春秋傳文異
同攷說文引經考駢字分箋稻香樓文集詩集藏於家
公氏程諱際盛乾隆庚寅庚子 恩科榜名同

御名第二字改避字奠若一字東治始祖晉新安太守

諱元譚至三十二世孫照遷休寧其遷長洲者爲公五世祖可意祖有楠太學生封朝議大夫父文詔太學生授朝議大夫俱累贈中憲大夫如公官祖妣黃繼祖妣陳妣朱俱累贈恭人繼母朱累封恭人歷內閣中書內閣侍讀湖廣道掌湖廣道署河南道兼署掌京畿道監察御史配吳恭人生子四女一先公二十九年卒繼徐恭人生子一女二子世萱增廣生世英光祿寺署正世華世芸俱太學生先卒世茂太學生孫元灝元濬元潞元澍元澍元濤其次元濂卽後世芸十歲而殤者也女三壻曰戈宙文曰蔣錫朋曰許乃賡女孫七公以乾隆四年

七月五日生嘉慶元年三月二十九日卒年五十有八
某年月日世萱等卜葬於某縣之某阡以吳恭人祔且
築徐恭人生壙云銘曰

公父勉亭公長者治命笑折券盈把文譙醴肴饋母也
以瘁致鬱其病肝閭公獲舉瘥加餐公侍親疾心力殫
微飲選艷邛辦此急友朋難視猶已施簠若櫛歲難紀
往在壬子秋漲狂設賑城北關及鄉公八閱月寐不遑
能其官不竟其用曰仕曰學材出衆漆燈熒熒罔時恫
中憲大夫福建分巡延邵建道賈公墓志銘

嘉慶元冬封印旣予嘔血兼晨醫以詩筆戒門人刑部

郎賈澄寓其先人遺狀乞志墓予以誼之不克辭而又
不克文也改歲首春乃發讀而塞其請按狀公氏賈諱
廷彥字吉士一字美堂世爲陽曲人祖灼之拔貢生候
選知縣贈朝議大夫父坊歲貢生候選訓導封朝議大
夫祖母王母孟俱封恭人子洲邑增生澄刑部主事女
一適太原處士傅山之裔履豐孫繼祖紹祖孫女三雍
正三年十月二十三日乾隆六十年九月十九日其生
卒之年月也嘉慶二年四月 日其葬之期其地則
某縣某阡也乾隆丙子其以優廩生貢優行之歲己卯
其以國子監八旗教習舉順天鄉試之歲也公以乙酉

春試吏四川權江安令歷納谿永寧江油旋補清溪縣
知縣縣環高山下故西藏孔道又大兵征緬夷凡軍需
牛馬及以病傷歸蜀營者大半由縣蒞縣四年驛不弛
民不疲旣移華陽而涉遠問起居者不絕時用兵金川
公黎明詣軍需局核昨日所出納旋詣各大府行館決
輓輸徵調之策若何侈若何嗇若何便不便夜漏下歸
縣收民間訟狀始退食食已復升堂治讞無大小未嘗
妄用刑必得其實而後已就枕率夜漏下四五公遷去
而有核減運費著賠之款華之民請於所司代償之遷
忠州直隸知州未任權守成都於所屬軍需收支歸撥

一如令華陽所爲擢守潼川逾年以孟恭人憂去服除

命以四川知府補用權建昌道川北道旋補龍安府知府先是辛丑秋江漲刷城東圯百餘丈城中半積水公先導江次築堤堤下作鑿嘴以殺水上種柳旁播草於江油之大平場中壩皆堤以禦水於郡東鴈子崖峭險處架偏橋三里餘以利行者在龍安八年方奏調潼川而特擢福建延邵建道不二年以疾引去絺帷布被裝齋武夷茶數十器而已公至性過人未嘗孟恭人病輒焚香禱于神其爲選人疲作忽蹶起誠洲曰吾兩月來未有以資養其亟典衣以寄幸勿言我病其罷守

潼川時軍事尙殷大府將以留任守制請公以孟恭人
居八十違侍八載固辭始止終喪不作佛事留賓茗飲
或諷以儉其親者公曰誣親悖禮莫此爲甚吾敢隨俗
以滋罪戾耶凡自守類此間嘗論親民之官必來自疾
苦而後能急人之疾苦公肄業成均輒手舉爨其棟選
引 覲也貨冠服獨往待漏其作郡不攜家不延幕當
予入蜀時軍興方亟論者以諸生梗餉饋當峻以法公
獨謂當開諭其所惑而予以自新故予在蜀五年未嘗
以軍需禡一生而令卒不梗至今思其言以謂愷悌樂
易之風有賢於猛鷙者之讐其下也嗚呼其忍弗銘銘曰

公治縣府士多瘠不肥其家民所德民良吏良一誠格
謂於讀書務實得徒資口耳復何益有子緡經被手澤
其一登第遂通籍年七十三未滿百歷官監司返故宅
氣佳哉卜窆若窆

朝議大夫福建福寧府知府蓉溪繆公墓志銘

乾隆六十年五月泉州水石米錢八千上官邀建寧守
繆公往平糶倉故虛乃便宜汎臺灣米以濟得不饑公
先以九月權福州府篆兼視鹽道篆甫自泉州歸而虜
空案發上官皆伏法道府直隸州吏議有差建寧屬有
七合計不下累鉅萬公毀家紓其難七人者幸無恙新

上官亦以是多公將薦公卓異而公心力竭矣病隔請
退未受代而卒嘉慶二年四月二十一日也距乾隆十
年正月十四日生年五十三其孤元益來告今嘉慶三
年十月日將葬公於邑之某鄉而請爲之誌按狀公氏
繆諱暉吉字愚若一字蓉溪先世南昌人洪武間有輔
國將軍應祥者以兵守蕪湖遂爲始遷祖曾祖大中順
治乙酉副榜候選知縣贈通議大夫祖振公太學生贈
通議大夫父孔昭河南按察使授鴻臚寺卿曾祖妣王
氏贈淑人祖妣沈氏俞氏母鄭氏生母高氏俱贈夫人
配朱氏贈恭人嚴氏封恭人子元益候補布政司經歷

女四嫁殤者一嫁者一未笄者二公蚤失怙伯兄山東
藩伯其吉以官廕生例注縣令偕入京肆力於學貢時
譽京兆試天津奏賦 召試皆不利時藩伯監司山
右乃以川運例筮仕濟南同知會

翠華將自江南回閱泃河堤工堤鄰微山馬場諸湖公
督辦第一段期又迫爲悉心相度分築如法

天語以爲遠勝南工各予叙加一級藩伯來東引避改
判開封府權鞏縣內黃縣陳州府河南府事嘗督睢河
東壩麻廠凡徵收一無所溢民聞風趨事惟恐後其抵
建寧也府城自乾隆四十九年大水後闕城無質庫民

無所緩急公慰勸再四各城門市肆遂廣新禮殿治城
壕刻萬石灘立標爲行舟引其他壘橋架閣便於民者
靡不舉郡署中一蔬一羹靡不出諸已于寒暑必加禮
曰吾不以科目進見之殊卹卹也於里黨必竭懽曰吾
不以膏粱炫思之殊懇懇也公事畢手一卷不輟嘗示
予荅溪詞四卷芊緜婉轉直入南宋人之室予擬爲序
之而未有以踐也其燕游晉游豫游閩游詩醉竹軒詩
予皆未之見不且嘗一嚮而知鼎味耶銘曰

公弟習吉曩尹襄陽予視楚學出公報章公兄子雋相
攸予曰稔公內行在家必達從政十年一面是謀時歲

己酉一麾閩甌來告官事去其疾苦不陵不援敢設城
府來告家事戒其怙夸克勤克儉庶免玷瑕相彼覆巢
有鳥翔若人爲鼎俎我爲琮珌力官致疾力疾辭官得
正而斃存順沒安鳩江之陽高旣屹屹言志寤宮我言
維則

壻上海喬淦玉繩覆梭

白華後稿卷之二十五

南滙吳省欽沖之纂

男敬樞星宰校字

殯表 殯志

李母葉宜人殯表

宜人姓葉氏吾邑歲貢生容齋之女上海歲貢生封奉
政大夫炯之室大理寺右評事丙曜之母也年二十二
歸奉政事君姑曹宜人得其歡曹宜人疾宜人侍湯藥
不交睫者累月疾止始復初又十餘年曹宜人棄養以
禮喪葬婚嫁叔與姑皆致其力李與葉族故大戚屬鄰
里以急告必應奉政素習靜家事輒委之宜人然十試

僂得僂失者再而丙曜試京兆五薦五落宜人無幾微
不平意第最以厲學擇交安義命既官廷評誠以慎民
命毋曠毋越以是人多賢丙曜今年春 國慶單詰丙
曜請以已封贈外祖父母宜人報曰吾六歲而鞠於姑
姑之夫王古航視吾若已女汝以已封贈吾父母誠美
抑以慰吾王氏姑之心第汝父早失怙賴汝從祖拙峯
公之教以有今汝其安汝父之志而汝之志且留以待
人以是賢丙曜愈賢宜人宜人體素健比歲喪婦一女
一孫二且厝火之警探丸之累肝鬱癥結丙曜思假省
而奉政輒止之赴至而丙曜述奉政之意乞予傳傳史

職也表若志史例也墓有志有銘或無銘殯有志有表
無銘文例也表其殯而其體如銘昌黎之於房使君鄭
夫人又例之變者也婦之德在不暱已親故漢明德后
之德爲至不暱已而推本於夫族之親其明於大義何
如者予故樂表其殯俟異日井椁而續書年月日與子
孫官閥云宜人生雍正十二年五月十五日卒於嘉慶
元年九月二十四日年六十有三子四長卽丙曜應璧
候選中書科中書應培邑庠生應墀太學生女六人俱
適士族孫男女俱四人俱幼

封安人王母黎安人殯志

安人姓黎氏湖南寧鄉人縣學生贈儒林郎翰林院檢討王君炳旭之婦上林縣知縣忻之妻翰林院檢討坦修縣學生寓修之母也父再尹母胡氏繼母彭氏譚氏與異母弟四人如一母上林爲贈君第八子年十七安人來孀弱上林一歲爨析贈君安上林以居居七年卒又四年上林母黃安人卒又十年己卯上林舉于鄉丙戌成進士其令陽朔時後又十三年矣安人自家挈其次子婦至以坦修同祖弟冲修振修泮修從從之賀之上林上林在官不四年安人在署不三年罷歸治任無一怨尤語也上林受田止數畝安人節脩入晝夜操作

田稍進受命服始御綰猶親視廚傳性慈愛上林第六
兒子厚嫂殷相繼歿安人撫其女旣而二孤之撫於其
四兄七兄者皆就安人撫以次授室籍縣學生乃去有
媵婢鬻可百金安人曰吾不忍令以賤終禮遣去坦修
嘗語余安人比脹膈恐成痞致參餌求療而十餘年來
安人寄蔬茗及箴箴皆出已手年未高而訃甚猝故負
痛再四請余文嗚呼文墓難文婦人又難故柳州之於
叔妣潛溪震川之於其妣往往自爲之然以禮義之教
之衰與其洽於人徵之男子不若徵之婦女子坤主者
嗇及其太過而終與於不仁觀安人之所以遇其婢者

而歎其德之盛且過於不妒而妾之者之尤盛也而因以知公姑從子之久與安而不去而又從去也安人生雍正三年二月初二日卒乾隆四十九年四月初六日年六十坦修攜其子名賢名翥名科自京師戴星歸稟上林命治葬地爲志之殯如此安人又有女子子三皆適士族

誥授奉政大夫順天府西路同知黃君殯志

黃氏世爲莆田龍塘人君少慧祖與父迭爲之師莆田試童子不下五千人學使者以君詩賦冠一郡入郡學第一年二十五矣旋受廩越五年舉壬午鄉試又十年

挑發直隸試爲令權元氏補阜城調獻縣遷大名同知
調石景山同知再調順天府西路同知西路衝且疲差
務填委屬州縣自大興宛平取決京尹外若良鄉涿州
車騎冠蓋暨雞狗詬誶之事無所不問君履任一年會
臺灣民林爽文等倡亂軍檄旁午年餘始定君監送輜
車累晝夜不交睫曉爲腫其治所曰拱極城距長新店可
五里店商賤糴貴糴穀未成爲券擬貴賤而責負者之
償謂之買空賣空比京國戶和之穀日昂君廉知其奸
請予及大司農曹公沒其貲入官得 旨給普濟堂養
窮民穀價遂平東路之寧河有于李二族爭大高泊界

官吏勤不決檄君往遂定其在阜城修學宮葺城隍廟
凡遣送鞘餉檻囚皆官給車廐不以歛之民其在獻創
日華書院肄生童歲庚子院士之鄉舉者七犯囚羅世
高過獻毆役索酒食君請重之罪制府以聞得 旨黃
碧海辦事認真朕不以小善而遣之也君用是佐郡而
順天四路同知其率屬與守郡無以異君之屬嘗告子
以君於賂遺無所取每按部未嘗肩輿至因憶己亥冬
予自浙江使旋道獻縣君相迓於道左禮畢策馬去予
以謂直隸長吏慣鞍馬其效如是乃今而知君自試吏
以來固未嘗一日輿以肩也嗚呼其可風也已君口澁

遇事則指畫如繪所衣無綸衣亦時付質庫公車過境
有謁者無不飲以屏屨有弟妹九人遇事必盡其力君
諱碧海字徵伯曾祖某議叙某官祖諱翼廷邑庠生父
諱乾三歲貢生俱贈奉政大夫大名府同知曾祖妣邵
祖妣陳妣陳俱贈宜人配陳氏封宜人子二錦輝俱太
學生距君卒一月餘而毀孫某君以雍正十一年月日
生以乾隆五十三年十一月二十七日卒既殯之官舍
之旁俟凍解歸葬焉而文之以爲非槨之用

封文林郎直隸武邑縣知縣杜君殯志

崑山之杜出晉當陽成侯有諱王保者仕宋爲湖廣巴

陵縣學官自洛陽遷於崑是爲君始遷祖祖天叙侯遷
州同父景鄴邑增生贈文林郎母方氏贈孺人生三子
君其季也少作文指擢胃腎經夜或不寐旣不得志於
有司則以國子生考職列一等授主簿復入貲爲選人
乾隆十八年 簡往雲南運京銅權南安州州判領乙
亥綱船以進沈三船撈摸折耗亟鬻產以償家遂罄還
滇攝新興州吏目君位卑所至與其長言詩文集士子
具饌會課其長以是嫉君罷去然人亦以是多君執業
者常滿故駐贖不甚困閼十數年竟歸予嘗領工部之
錢法運銅官交兌多不足疑當局官吏之故而不必然

水險路長領運官止牧令不能多僕從僕從之乾沒船
戶車戶之捭耗日朘月削有祿命者年餘幸抵局否者
往返三四年抵局兌收而官始保抵牾而命始保廿年
前予邑人呈貢令王廷欽以是溺洞庭一子亦溺其未
字女聞而自盤五六年來令銅船入峽出峽凡湖江程
路方面官親自護送以小舟導其夷險詢其竊攘其患
稍衰息焉牧令如此況倅尉哉況新令時未下哉君歸
時年踰五十逮母養以終母之世性好善族黨稱爲長
者又十餘年而子羣玉舉於鄉又十餘年北來就養比
年不良於行羣玉乞歸養旣投牒作詩述懷乞子和和

有庭訓原無造業錢句君領而誦之嘉慶二年六月十四日戊子也越己丑日下春令人掖起坐遽逝殮之日色笑如生聞者多以謂孝謹淳懿之應距生康熙五十六年十一月十八日年八十矣羣玉走使乞爲傳子應之曰非史官不立傳亭林之言也昌黎王承福傳係之雜著毛穎傳係之雜文皆寄托而作也其碑誌文十三卷祭文亦二卷謂二者中法也今葬未有期富爲文表諸殯俟葬而詳其時地樹石識其後可君諱讚字嵩岳號雪堂以羣玉官直隸武邑縣知縣受封文林郎配唐氏贈奉直大夫孝廉方正德宜女先君十五年卒

勅贈孺人子一卽羣玉孫三人長狝縣庠生次翊次翺
俱幼

桐鄉廩生金熙泰殯志

予自歸田後衰疾畏談藝今年春金生熙泰傅舟介予
族子蔚光及其舅張氏伯興載仲興鏞固請來執業三
子具文望不於三子之執而又不獲堅拒輒隨手點定
其時文及辭賦數十篇未數月業日進旣落浙闈其仲
舅捷問至越兩旬生落薦之卷亦至會飯遂噎噎已飯
如故不汗矣而醫者劑以補室注剗臂肉療焉竟不起
嘉慶六年十月初九也距生乾隆四十四年七月二十

日年二十有三無子金舊賢休寧生高祖康熙庚辰進
士工部主事贈資政大夫南廬先生樟居太倉而籍桐
鄉故世爲桐鄉人曾祖刑部員外郎記名御史燾子官
中書時嘗以後進禮見祖垣刑部員外郎歿於海運倉
監督任未一月而父太學生鏞卒於毀鏞弟鎰鬻所居
以了積逋且營葬生齒纔齟隨母依外王父母居婁之
塔射圃晝侍伯仲舅課夜侍母課母故善詩篝一鐙手
績而口授之生用是聞於吳會間試屢冠其儔衆僉謂
金之宗庶以亢卽以相法論萬無夭折理也雖然死於
醫者多矣其死於才而不遇者亦多矣生也有名頤以

爲之祖有孝與節以爲之父母習華綺而已集於枯槁
短折而遂缺其養賁恨於黃榜者尙淺而齋恨于白髮
者更深使異日并此數十篇之可傳者而付之蛛絲蠹
蝕間亦無如何也幸也身後五十三日而得一男也此
其舅之所以悲且以喜亟欲見余而爲之請也系曰何
文之富兮而遇之窮何身言兮甚偉而齒數不豐誦芬
兮而躬弗享其報舍命兮而室弗收其效天耶人耶靈
徠載告

婿上海喬淦玉繩覆校

白華後稿卷之二十六

南滙吳省欽沖之簪

敬樞星宰
男敬沐起元校字

壙志 墓碣 厝志 事略 祭文

誥封夫人晉贈一品夫人元配查夫人壙志

夫人江蘇婁縣人氏查諱靜父諱澤祺國子生贈文林
郎母陳孺人乾隆庚午年二十二予贅焉又四年予客
九江歸始偕歸下沙時先大夫已歿先夫人繼王母倪
太夫人愛之甚視予弟妹猶弟妹也夫人孕屢墮視妾
出女子子視予弟省蘭子女猶子女也在予湖北使署
予弟婦許夫人卒於京疾革呼夫人晝夜不絕聲夫人

喘且腫累三四月始革冬寒子弟每五鼓入直必刺闔
訊問否申盡出來視移晷始去而夫人故事佛前年四
月子歐血入冬漸瀾去年三月夫人忽語予入了髻山
報佛力止不可歸而病病間復作臘之二十三日立春
矣凭几不能臥起子弟爲文禱東嶽之神而不使予聞
越二日夫人食漸進又三日神氣湛然稍稍任應荅予
弟喜以語夫人夫人遂言禱予病事詎間日而勺水不
復入又二日而絕戚里僕婢慟哭失聲者累月予何以
自克也夫人端重而機敏年十三陳孺人在薜卽能治
中饋稽匠作辨租入之贏縮凡物材物值之良枯貴賤

億輒中又紡績針黹之授值輒過人以故子祿歲失館而糧不絕以翰林三視學而祿不耗蠹不積在蜀時別予下三峽呼聞者授燭一器曰燭罄主且代比受代而燭餘二條他處分多類此於奉已甚嗇而見有難必急於文義止粗習而人以吉凶禮來問皆倚辦性卞直事過輒自悔爲予婦四十三年今引紼矣陸學士璞堂來送曰憶辛巳冬伯焜過吾子子爲吾請夫人綻布袍因語子弟曰子尙有一裘曰此吾嫂嫁衣所改爲當夫人在時予兄弟以謂固然而忘之今言之而有餘痛焉予其忍過乎物哉夫人以雍正七年十月二十三日生卒

於乾隆五十八年正月初四日年六十有五是年十月初四葬妻之白漾灘而治予生壙子敬樞孫樹榮女子壻二候選郎中蕪湖繆雋上海附貢生喬淦以夫人之志行僉謂中銘法予謂不銘可不志不可乃文其窆石而布之版

例贈文林郎歲貢生蘆溪朱君墓碣

君氏朱諱振新字明輝系出徽州之紫陽再遷富順明萬曆丙戌進士苑馬寺卿菖有政行門人文翔鳳太青志其墓者君五世祖也菖生萬祚萬祚生元極元極生珂珂字子範是爲君曾祖祖父前母盧後母黃黃爲子

範公繼配生君六兄一弟旣析居葫蘆沖乃自號蘆溪
以興文縣廩膳生例貢太學習禹筴邑中大工役多首
爲之倡官私稱便姻黨有評詬者輒來質成是非得失
決機洞中而平居粥粥若無所能見義必爲所周恤無
算而奉己甚約家亦無餘財當子範公之疾革也命諸
孫占興文籍以試故君子長僱次佶皆試興文興文人
詰之子稽覈而反之佶旣以丁酉拔貢旋舉鄉僱以庚
戌成進士佶弟侃已酉亦拔貢侃弟侑侑弟俛先後籍
廩生五子者皆君配黃孺人山也僱需次伊邇去年秋
忽急裝寧其親今年辛亥春佶自山西以君訃及狀至

曰先子以今二月日祠邑之賈家壩祖塋卒於乾隆五十五年十二月日其生以雍正七年十二月日信權縣事者四輒奉書戒以毋驚利毋炫名毋見才使氣置民事不問而用其不必用之心鮮有不敗者他志行多類此幸閱而見之於文予後君生僅五日歐血後不敢應文字之請第以儻若佶之足以致館閣而親民之吏吾學所易以見端則姑以館閣侯諸子而所以教於家施於鄉者握若佶敬志之而出治焉是亦君用世之學與其志也君二女適某某孫一以例并書之碣

吳君虹若權厝志

君諱葆光字虹若一字心泉曾祖諱國啓歲貢生祖諱宏
祖候選訓導贈中憲大夫內閣侍讀父諱慎旃太學生
母薛氏君之祖嘗自休寧僑常熟置田宅而君應杭州
商籍試補錢塘縣學生員歸籍常熟入成均充四庫館
膳錄注選鹽庫大使往來京師非其志也病瘵者七月
矣猶自以無死理曰葆光幼而孤吾母養且教吾世父
翼之以有今男女子以失母鞠於吾母天豈其酷吾母
之甚也葆光業舉子文念同祖兄蔚光熊光皆得第爲
朝參官同會祖弟錫齡雖早世然魁殿試榜尙有以他
科雋者門祚差盛豈其以是竟也子固強使言泣然曰

願吾母毋以葆光故過戚願吾兄寵光謹身節用毋俾
吾母憂葆光有妹三一歿一廢願張氏妹以爲念葆光
有湖田百餘畝錢六百緡願同祖兄道光爲料理資俯
仰有遺衣三箇爲男女子婚嫁用毋論財男女子以屬
兄熊光嫂金遺居若得售千餘金以其二遺兄寵光毋
憾予與侍疾者秉筆作書猶自署葆光口授字也息將
盡曰妹壻張燮爲葆光給館吏四十緡而忘之予撫而
哭曰脫不幸吾以賻子矣復舉手曰幸銘我遂歿乾隆
五十二年九月二十五日也年三十八歲櫬歸權厝于
邑之三舉原孤嶧基六歲耳嗚呼君之祖母查爲予室

總服之姑君前母又予室族姊子於君請弟兄抗顏自處悲君之可遇而不遇於有司乃其誰愿矜厲一介不苟故彌留而不以欺其志也嗚呼悲矣

旌表貞孝宋查氏事略

貞女查氏婁縣監生贈文林郎澤祺次女子室查夫人之妹也未笄許配奉賢縣儒童宋森森暴卒訃之家人祕之貞女時年二十以母陳孺人神色不常伺間得其實慟幾絕家之人護視甚密復自繆於簣覺而救之誓殉焉如是者三閏月始聞之於其舅姑定議迎貞女歸守志時舅姑齒漸衰家亦漸落貞女親井臼織紉烹飪

之事爲嫗婢先問侍起居舅姑謂不啻森在側也舅歿
遺貞女田百餘畝視仲叔季季幼所生母主其產仲叔
耗殆盡惟貞女節蓄衣食操作達曙水旱盜賊不之及
四十五年冬以已力營舅姑之葬而森附焉先是姑氏
潘以哭子哭夫故喪明飲食起居貞女不離左右者十
餘年備禮殯殮視所以事舅者以夫弟之子淳爲子督
教之甚至貞女自幼若成人言笑不苟受孝經四子書
能解大義爲女工工而特敏卽耕作之早晚得失若夙
習者以是舉其職而遂其志乾隆五十三年貞女年五
十二守志者三十一年矣邑之人請于所司得

旨予旌爲書其槩如此

祭沈華萃光祿文

京卿遷職雁序是循公領五品公近六旬何必鴻軒寧
煩鳴嚇堂有板輿庭有捧檄距應舉日三十稔餘握手
爲樂載弦載壺薄病乍瘳兢兢引對或攬其環或挈其
袂 帝曰休止賦歸去來賣宅買船以竣沂泗藥裹

無需巾車屢載花市魚臺此債遊債官已疾已於理則
常卮酒自勞曷云其亡時暮之春倉惶皇復矐首老親
平頭舊僕公能療疾而不自鑿喀焉物化如有天倪公
能其文甲科用遇公能其司夏官用叙公立西臺霜簡

晝寒公視南浦雲帆路安玉不去身塵不去手言貳飽
卿儲望已久辭郭隗臺指范蠡湖千金足豪不買佛奴
奕世單傳而必黃耆公也不然含暝何有挽鹿斯絕隱
豹孰偕令子載星蓼莪永懷曰昆既裕曰親既顯絲岐
璧良有憾應展追惟同舉接席聯茵公歸魂黯公歿淚
紛天道難論人生至此斗酒隻雞惟靈歆只

祭曹習菴學士文

公未弱冠詩在人口時名爛焉諸生祭酒洎奏賦初公
提予肘昵作賦辭以應他友以割片氈以饋三韭僕御
慙焉我覩公守待 命江臯其笠孔糾公涕而謦謂我

衰首失者茅龍得者芻狗同時拜官亦幸亦偶越巖來
都破書敝帚趨直無車且談且走我旋憂去公鼓莊缶
遁羽木天我躡其後賭酒雖孱聯吟肯首館書叢叢院
文妃耦作賦 殿前鸞吟虎吼公患綺靡我漸粗醜我
使西川五年永久歸途晤公秦城北斗七日勾留灞橋
折柳我旣還朝公旋奉母晨星在霄舊雨在霽驅馬過
從相看成叟情話轉親道言善誘一樹南枝絲宜斷藕
公領我行雲夢楚藪受代言旋公屢遷右得士樹人矚
然无垢使粵倣裝板輿綏受八座起居三霄濃厚歲未
周星堂萱摧揉公返自連血淚盈甄其立不偯其咽卽

嘔作惡須臾苦次臯某上距母喪三旬颺颺天旣難呼
神亦罔叩致毀禮嚴遇哀古咎獨行如斯文苑何有在
穹壤間是皆不朽爲攬遺篇如飽糧糗爲眷遺徽如佩
瓊玖職領校官年閱中壽江鄉椽筆謂王光祿禮堂待
錢少詹竹汀
碑珉琇紙錢載塗椒漿奠膈歎逝感言靈其歆不

下沙先祠焚黃祭文

昔我 高祖考元吉府君瘞鶴播遷春鴻況瘁代鍾潛
德仰彝訓之親承世守遺經嗟祿養其未逮省欽竊窺
東觀游長西臺辱以無狀而歸幸及有田則祭前此屢
膺 寵詔未舉焚黃今茲祇告靈筵載申戀赤粵 馳

贈資政大夫內閣學士兼禮部侍郎稽察中書科文淵閣直閣事本生曾祖考嘉會府君在省蘭履任之時遵恩詔貤封之請茲屬三湘奉使是用一體舉行雖祠堂與邱壟稍殊而魂氣較魄藏尤近嗚呼戴生成於君父榮甚哀纏通昭假於幽明涕隨喜極

查夫人焚黃祭文

嗚呼夫人之逝斯今八年在我心目永夕睟睟繄惟克相豈惟相憐孝於姑嫜顧我弟妹視我姪男所生奚啻手理裁縫手親爨饋於已繼嗇於物惠慈躋六十三烹飪始辭閭歲我病僉謂弗治湯藥餌食夫人必親願減

已算禱于玉真痼疾遂甦香幣祇薦曰了髻山神居攸
奠成禮言旋膏肓纏患惟冒天倉病自疇昔重腿龍鍾
以几代簣沈縣十旬至于此極如麻壺政我贖我聾我
僕我御有惡孰攻由苑致枯銜憾莫窮壹者歸田衣食
資給緬出峽船鮫宮呼噏仰戴恩施俛懷井汲生封
二品歿贈有加服茲荆布貌是笄珈焚黃登壟如招楚
些祇告

擬關帝加封告祭文

戊子
舊作

明威有赫合九土以欽承誠感匪遐閱千秋而崇報載
揚嘉號用展精禋惟關帝忠本性生氣由義配威行

華夏英風則青史長留志在春秋禮祀則素王同秩昭
茲靈貺翊我昌朝 特加神武之稱更備優崇之典澤
延以世章服分膺榮及所生珪封累晉朕式循前軌夙
仰遺徽旣改謚以協公評復諱名而申庸敬至如神功
默運義烈丕垂雲車風馬之間聲容儼在甘醴柔牲之
曾綏祐孔長宜備隆稱庶彰祇奉謹加封爲 忠義神
武靈祐關聖大帝爰舉彝章並昭虔告於戲瞻新題于
神座肝鬢如通陳嘉祝於祠筵鴻庥永藉尚期來格顧
此居歆

增上海喬淦玉繩覆校